

կեան նստում բակում, ծառերի տակ, փոքրիկ աւազանի մօտ:

Բակի անկիւնում, բարի մի վանդակի մօտ, ճերմակ, երկայն պոչերով աղանիւներ են ման գալիս: Նրանք ման են գալիս տատանուելով եւ կտուցում են խոր մի լուծթին:

Ռօման սիւնների ետեւ ծաղիկներ են շարուած: Մանիօլինայի հսկայ մի ծառ՝ ծանրօրէն բանտարկուած ու երկնքի պայծառ մի կըտոր ընկած վերի յարկի պատուհանների վըրայ:

Հայոց աշխարհիկ, դարունդ է հասել:

Ահա գեղեցիկ դարուն թո եկել...

Իսկ հայոց աշխարհում հիմա ձմեռ է:

Մշոյ դաշտի դիւղացին իր փափախի վրայից թափ է տալիս առաջին ձիւնը: Վանքի արեւելեան խուցերից մէկում, փոքրիկ սեղանի առջեւ, նստած է երեւի երիտասարդ մի վարդապետ, գիր ու գիրքը առջեւ, բայց միտքը հեռուն, վաղուց լքած հայրենի երկրում:

Կովը փակել են գոմում: Խնձորենու մերկ ճիւղերը սարսուռ են: Բակը ճերմակ է: Զիւնի վրայ քայլեր են մնացել եւ աշնանդ, ուր ոտքը ծանր է քայլել, կազմուել է ցեխ եւ ջուր: Իսկ աքլորը յիմարօրէն կանչում է: Լեռները խիստ են, մեծղի եւ բարձրաբերձ: Մամը դուրս է եկել, հաւերին կուտ է տանում: Գլուխը ծածկել է մեծ մի շալով, բերանի վրայ կապոց դրել եւ որովհետեւ ուզում է արագ քայլել՝ տանիքից մի քիչ ձիւն է թափում:

Վարդապետի նայուածքը կէս մութ խուցում սեւ մոմեր է վառում եւ սիրտը հեծկըտում է ու երգում:

Յուրա-ցուրտ ձմռունք

Բրդան յարձակ հովերէն,

Սպիտակ կարւանք

Իջան լեռանց կողերէն.

Փշեցին պինդ քամիներն,

Հա՛, փշեցին,

Մառով ձիւնով զսարն ու զձոր զուգեցին,

Վարդն քափուր վատեցաւ,

Ծիծղուն ծաղիկ ծածկեցաւ,

Եւ Հայաստան սուղ մտաւ...

Այնտեղ...

Սուրբ Ղազարի շուրջը մեղմաղձոտ աշուն է փայլում: Պատերի վրայ դռնատ թէյ-

վարդեր են կախուել: Ծաղիկները թառամում են եւ մանիօլայի տերեւները լաց են լինում փոքրիկ աւազանի վրայ:

Աշունը պատուհաններից ներս է մտնում՝ անձայն բոթոթներ կախած ուրուական՝ կանգ է առնում խուցերում, գլուխը սեղմում կրծքերի վրայ եւ սազի երկու թելի վրայ զնդընդում:

Վարդապետները շոյում են իրենց մօրուքը եւ յառում մերկ պատին:

Իսկ ինքը Ալիշանը՝ պզտիկ, նիհարուկ այդ ծերունին՝ դուրս է գալիս իր գերեզմանից եւ անհանգիստ ոգու նման թափառում է:

Նախ այգայէս.—

Առաւօտեան ժամը 5-ին, աղամամութիւն, երբ Լիդօի վրայ դեռ թանձր մշուշ է պառկած եւ Ադրիականը մոնչում է կէս խաւարի մէջ. երբ Լազունայի սիւնների վրայ դեռ արցունքոտ լոյսեր են կախուած եւ կամպանիլլէի փշրուած հրեշտակը ասող է փնտռում կաթնագոյն ամպերի ետեւ. երբ արսեմալի պահապանը աչքերը ճմոռում է եւ նայում ժամացոյցին. երբ Սան Նիկողօյի մօտ Հնդկաստանից եկած մըսկոտ անգլիական մի նաւ սպասում է լուսաբացին, որպէսզի կարողանայ նաւամատոյց մըտնել՝ Սուրբ Ղազարում հնչում է զանգակը, խուցերը բացւում են եւ վարդապետները, բաւակ փիլոններ գցած իրենց ուսերին, քունով լեցուն աչքերով, դանդաղ եւ խստադէմ, շարքով իջնում են եկեղեցի, մի մի մոմ են վառում եւ շոքում են նոտարանների վրայ:

Մինչ մութի մէջ վարդապետները շարականներ են երգում, եւ մեծ զանգը զօղանջում է երեք անգամ, ամպերի հետ հաղորդակցութեան մտնելու համար՝ Հայր Ղեւոնդ Ալիշանը, խոնարհաբար ձեռքերը կրծքին սեղմած, ոսկրուտ ծնկերը գետնին, աղօթում է դռան առջեւ եւ երկրպագում:

Կէս ժամ յետոյ, ճիշդ այն ժամանակ, երբ անգլիական հաստափոր նաւը ճեղքում է ջրբանջքը եւ արեւելքում արեւը կարմիր տօն է կատարում, Ալիշանը, արագ եւ աննշմարելի քայլերով հեռանում է դռան մօտից, դուրս է գալիս պարտէզ եւ Փոսփորէ աչքերով նայում է աջ եւ նայում է ձախ, ծանր լուծթեան մէջ իր ճամբան փնտռելու համար: